

Z 6
500





552 QK 293

v. Ende

Zb
500

10 Eine Leichpredigt
Vnd

Christliche Betrachtung

des seligen Abschiedes aus dieser Welt /
Der Edlen vnd viel Ehrentugentsamen Frawen ANNA
VON ENDE, des weiland Edlen / Gestren-
gen vnd Ehruehsten Junckern Gottfried von Ende
auff Picha vnd Planckenhain seligen nachgelassenen
Widwen / welche am Narwen Jarstage des 1595.
Jares zu Reinhardts Grim / sanfft im HERRN ents-
schlaffen / vnd den 11. Januarij doselbst in der
Kirchen Christlich vnd Ehrlich zur
erden bestattet worden.

Gehalten durch

M. THEOPHILVM GLASER
Pastorem vnd Superintendenten
zu Dresden.



Dresden.

Gedruckt bey Gmel Bergen.
M. D. XCV,



V. 140



Q
R
E

D
ga

gli



pr
nu
te
re
ric
al

Faint, illegible text, possibly bleed-through from the reverse side of the page.



Dem Edlen / Bestrengen vnd
Ehrwehsten Georgio Vdalrico von
Ende / welland Churf. Sächs. Assessor des Sammerge-
richts zu Speir / 2. Jeho Churf. in Vormünd-
schafft geheimten Rath.:

Auch

Den Edlen / viel Ehrentugentsamen Jungfrauen Mar-
gareten vnd Katharinen von Ende / Anna / Elisabeth vnd Marien
von Karlowis. Der Edlen viel Ehrentugentsamen Frawen
Anna von End / seligen hinterlassenen Töchtern / 2.
Meinem Großgünstigen Zureker vnd lieben Beuatter /
Auch in Ehren gencigten Förderinnen.

Gottes Gnade durch Christum / sampt nachmals
glückseliger wünschung eines gnaden / freudenreichen / lieben neuen
Jars / Auch friede im heiligen Geiste / neben erbietung
meiner willigen dienste / fleißigen vnd herhlichen
Gebet zuvor.

A Dler / Bestrenger vnd Ehrwehster / Groß-
günstiger lieber Herr Beuatter / Auch Edle
vnd viel Ehrentugentsame Jungfrauen / auff
L. L. G. vnd L. T. an mich geschehenes suchen
vnd embsiges anhalten / habe ich die Leich-
predigt / so bey dem Christlichen vnd ehrlichen Begeng-
nis Ewer lieben Frawen Mutter seligen in der eile gehal-
ten worden / so gut es vnser lieber Gott in diesem schwe-
ren bekünnernis verliehen vnd gegeben / in offenen Druck
richten vnd verfertigen sollen / Weil es L. L. G. vnd L. T.
allerseits so gefallen / vnd sie vermeinen / das ihnen diesel-
bige

A ij

bige

bigte tröstlich gewesen/ auch andern anmutig vnd nützlich
sein könnte. Wie den alle Christen sich offte vnd viel nicht
allein der ihren/ sondern auch ihres selbst Abschieds vnd
letzten stündleins / mit König David erinnern vnd beten
sollen: HER R, lehre doch mich / das ein ende mit mir haben
mus/ vnd mein leben ein ziel hat/ vnd ich darvon mus. Sihe /
Meine tage sind einer Hand breit bey dir/ vnd mein leben ist wie
nichts für dir / Wie gar nichts sind alle Menschen / die doch so
sicher leben/ Sela. Vnd mit Mose dem Man Gottes im
90. Psalm: HER R / Lere vns bedenecken / das wir sterben
müssen / auff das wir klug werden.

Desgleichen mit dem Könige Salomone das Memen-
to nouissimorum practiciren. Sintemal auch die Weiden
ihr Discipulo für die höchste weisheit geachtet / Wie
man von dem Keyser Augusto liest/ das er ihm täglich
^{εὐχαιαρία} gewünschet. Wie viel mehr sol heutiges tages
aller Christen fürneme vnd höchste sorge sein/ das sie ein
sanfftes / friedliches vnd seliges stündelin davon bringen
mögen. Zu welchem ende vnd seligem gedechtnis meiner
freundlichen lieben Frawen Beuatter / thue E. E. G. ich
diese Reichpredigt hiermit dediciren / neben hertzlichem
wunsche / das der Vater alles trosts / aller gedult / gna-
den vnd barmhertzigkeit E. E. G. mit Himmlischen trost
erfüllen / in Brüderlicher vnd Schwesterlicher liebe / tre-
we / friede vnd einigkeit / auch in langwiriger gesundtheit
vnd allem guten / an Leib vñ Seele / sampt allen den ihren
segennen / viel Jare fristen vnd erhalten wölle/ vmb seines
lieben Sons/ vnser einigen Erlösers vnd Seligmachers
Jesu Christi willen / Amen. Datum Dresdæ in die conuer-
sionis Pauli, Anno 1595.

E. E. G.

Williger G.

M. Theophilus Glafer.

P. & S. D.

TEXTVS.

Luc. 2.

Und Simeon segenet sie / vnd sprach zu Maria seiner Mutter / Siehe / dieser wird gesetzt zu einem fall vnd auferstehen vieler in Israel / vnd zu einem Zeichen / dem widersprochen wird / Vnd es wird ein Schwert durch deine Seele dringen / auff das vieler hertzen gedancken offenbar werden.

Und es war ein Prophetin / Hanna eine Tochter Phanuel / vom Geschlechte Aser / die war wol betaget / vnd hatte gelebt sieben Jar mit ihrem Manne / nach ihrer Jungfrawschafft / vnd war nu eine Witwe bey vier vnd achtzig Jaren / die kam nimmer vom Tempel / dienet Gott mit fasten vnd beten / Tag vnd Nacht. Dieselbige trat auch hinzu / zu derselbigen stunde / vnd preisete den HERRN / vnd redete von ihm zu allen / die da auff die Erlösung zu Jerusalem warteten.

Auslegung.

In diesen jetzt verlesenen worten / Hören wir von zweyen Zeugen des newgebornen Kindleins IESV CHRISTI / vnser einigen Erlösers vnd Seligmachers.

Erstlich / Von dem stelnalten Simeon / wie der durch anregung des heiligen Geistes / eben zu einer gluckseli-

A III gen

gen Kunde in Tempel kommen/ vnd was er von diesem
Kindlein gezeuget vnd geweissaget hat.

Zum andern/ Von der verlebten Matron / der
Prophetin Hanna / wer dieselbe gewesen/ wie sie gelebet/
vnd was sie für ein schön herrlich zeugnis diesem new-
geboren Könige der Ehren / öffentlich im Tempel gege-
ben / den HERRN gepresset/ vnd von ihm zu allen ge-
redt/ welche auff die Erlösung zu Jerusalem warteten.

Von diesen beiden Zeugen wollen wir kurtzlich im
Namen der heiligen Dreyfaltigkeit handeln bey diesem
Christlichen Begengnis / so viel der Allmechtige Gnade
verleihen wird / Auch der verstorbenen Adelichen
Christlichen Matron ihr gebürlich zeugnis geben.

Von dem Ersten.

Belangend den alten Simeonem/ lesen wir von dem
selbigen im Luca am 2. Cap. das ihm vom Euangelisten /
sonderliche Epitheta vnd gute Namen attribuit vnd gegeben wer-
den / In dem er sagt: Siehe/ Ein Mensch war zu Jeru-
salem / mit namen Simeon / vnd derselbe Mensch war
from vnd Gottfürchtig / vnd wartet auff den Trost
Israel / vnd der heilige Geist war in ihm. Vnd ihm
war ein antwort worden von dem heiligen Geiste / Er
solte den Tod nicht sehen / er hette denn zuuor den Christ
des HERRN gesehen.

Von

Von dieser anwort lesen wir im Nicephoro lib. 1. cap. 12.
 Hunc Simeonem, fama est, ex eis fuisse vnum, qui virtute, dig-
 nitate, vitæq; sanctitate excelluerunt, qui quum aliquando illi
 Prophetæ Esaiæ oraculo legens incumberet, quod ait: Ecce
 virgo vterum gestabit, & concipiet filium: & de diuini eius res-
 sponsi fide ambigeret, Angelum ita fluctuanti ei astitisse fe-
 runt cum oraculo eiusmodi: Non illum prius vitæ huius
 vinculis solutum iri, quàm id, de quo credendo addubitasset,
 præ foribus primo quoque tempore appropinquans, & oculis
 ipse suis conspectum testimonio suo confirmaret. Quam ob
 causam ad tantum senium prouectus, quum Christum Dos-
 mini oculis suis conspexisset, eundemq; in vlnis gestasset, car-
 nis mole protinus solutus atque liberatus est.

S A nun der HERR Christus von seinen Eltern
 nach den tagen der Reinigung in den Tempel getragen /
 vnd dem HERRN nach dem Befehle Mosi dargestellet worden /
 Kompt Simeon / durch anregung des heiligen Geistes / eben zu
 einer glückseligen stunde in Tempel / erkennet den rechten waren
 Messiam / vnd fasset ihn mit besondern freuden auff seine Arm /
 machet ein Canticum παρακλητικόν, Trost vnd sterbeliedlein /
 singet vnd wünscht ihm keine stunde zu leben / Sondern / wie seine
 Wort lauten / In fried vnd freude dahin zu fahren / weit
 er die Gnadenreiche zeit erlebet / das er Christum den ewigen Hey-
 land / das Licht der Heyden / vnd den Preis Israels gesehen. Dar-
 über sich die Eltern des HERRN Christi zum heftigsten verwun-
 dern / vnd solche Propheceyung in ihrem herzen bewegen.

Es hat aber Simeon den Namen in der Ebreischen sprache
 von Schaman, audiuit vel auscultauit, welches bedeutet einen
 fleißigen auffmercker vnd zuhörer / der Gottes wort nicht allein
 höret / sondern in rechtem waren Glaubensfasset / in seinem herzen
 beweget vnd widerholet.

Haben.

Haben also wir in allen Stenden/Geistlichen/Welt-
lichen vnd Hausregimenten/ zu lernen/ das/ wenn wir wollen
rechte Christen sein/ so müssen wir Simeones vel auditores wer-
den/ das ist/ fleißige Zuhörer vnd auffmercker/ wie wir sehen an
den Eltern des HErrn Christi/ das sie sich von hertzen verwun-
dern vber dem/ was vom Zacharia/ der alten Elisabeth/ dem Engel/
den Hirten/ Simeone/ den Weisen aus Morgenland/ von dem
armen/ elenden/ vnansehnlichen Kindlein für der Welt/ geredet
wird/ das es so fein miteinander/ dazu auch mit Moyses/ allen
Propheten/ vnd Psalmen übereinstimmet/ ergern sich nicht an sei-
ner geringen gestalt/ besprechen sich nicht mit ihrer Vernunfft/
Sondern glauben dem/ das von ihm gezeuget wird.

Also sollen wir auch Gottes wort von Christo mit freuden
hören/ vnd in einem feinen guten hertzen bewaren/ demselbigen
glauben/ vnd nicht mit fleisch vnd blut/ sinn vnd wis/ verstand
vnd vernunfft/ welche wieder den glauben siche/ vns besprechen.

Wann die Papisten/ Sacramentirer/ Caluinisten/ Wi-
derteuffer vnd andere schwerer solchem Exempel folgen/ so wür-
den sie nicht so viel irrthums vnd jammers in der Christenheit
stifften.

Wir sollen auch die Sprüche des alten Testaments mit ein-
ander vergleichen/ vnd vns darüber verwundern/ das sie also fein
über einstimmen.

Zum Andern/ sehen wir/ das zu dieser zeit wenig
vnd vnansehnliche/ nemlich vier elende Personen/ Joseph/ Ma-
ria/ Simeon/ Anna im Tempel gewesen/ vnd Christum erkent/
angenommen vnd bekant haben. So pflegts allwege dem Herrn
Christo vnd dem Euangelio zu gehen. Derwegen wir vns nicht
dran

dran ergern sollen / wenn wir noch sehen / das wenig vñ nur
vnansehnliche Leute sich zur Kirchen finden / vnd dem Wort
Gottes zugethan sein / der Weg zum ewigen Leben ist schmal /
vnd die pforte ist enge / vnd wenig sind / die ihn finden / wie
der Herr Christus zeigt / Matthe. am 7.

Zur zeit der Sündflut war nur Noah selbst
achte in der Archen. In Sodoma vnd Gomorra war niche
mehr denn Loth mit seinem Weibe vnd beiden Töchtern für
der grossen brunst bewaret. Vnter Sechs mal hundert taus
sent Menschen giengen ihrer nur zwey ins gelobte Land / Jo
sua vnd Caleb. Vnter vielen tausenten Israeliten saget
Gott zu Elia / das nur 7000. weren / welche die Knie
für Baal nicht gebeugert hatten. Vnd Esaias sagt 1. cap.
Was noch vbrig ist von der Tochter Zion / ist wie ein heuß
lein im Weinberge / wie eine nachthütte in den Kürbisgar
ten / wie eine verheerete Stad. Wenn vns der HERR Jes
baoth niche ein wenig liesse vberbleiben / so weren wir wie So
dom / vnd gleich wie Gomorra.

Zum dritten / Simeon bekennet hie Christum
öffentlich / vñ wünschet ihm zu seinem reich Gottes gnade
vñ segen / wie auch das volck zu Jerusalem in seiner einreis
tung. Also sollen Christen dem HERRN Christo / seinem
Wort vnd Reiche / Gottes segen vnd gedeien wünschen / vñ
sonderlich wenn wir sehen / als iho geschicht / das der Teuffel mit
Rebereien vñ euserlicher gewalt sich vnterstehet / dem Reich
Christi schaden zu thun / vñ da sonst reiche vñ gewaltige nes
ben ihrem gebet / auch mit ihrem reichthumb vñ vermögen
sollen das reich Christi befördern helfen / So können auch die
armen / ob sie gleich sonst nichts darbey thun / doch für das reich
Christi beten / Psal. 121. Rogate, quæ ad pacem sunt
Ierusalem.

Vnd

Vnd nicht allein sollen wir CHRISTO / sondern auch vnsern nechsten alles gutes von GOTT wünschē / wie Christus seinen Jüngern den frieden wünschet / vnd vns befihlet das wir gleicherweise thun sollen / Vnd wil vns in keinem wege gebüren / das wir denselbigen fluchen vnd alles arges wünschē sollen / auch vnsern feinden nicht / die vns doch fluchen. Rom. 12. Segnet die euch verfolgen / segnet vnd fluchet nicht. 1. Pet. 3. Vergeltet nicht böses mit bösem / nicht scheltwort mit scheltwortē / sondern dagegen segnet / vnd wisset / das ihr dazu berufen seid / das ihr den seggen beerbet.

Simeon thut auff seinen seggen eine sehr bittere vnd herbe predigt / vnd weissaget traurige ding aus dem heiligen Geist / wie es dem Herrn Christo ergehen / was seine Mutter für freude an ihm erleben werde / vnd wie es der lieben Maria vnd allen Christen auff diesem jammerthal ergehen werde / Wie dann Prediger nicht allein sollen süsse / sondern auch sawer predigen / vnd nicht allein den bösen das vbel vnd Gottes straffe vermelden / sondern auch den Christen ihr Creutz verkündigen / damit sie sich dazu gefast vnd geschickt machen. Es tregt Simeon die beyssorge / Maria möchte gedenecken / sie würde mit ihrem Sone im rosengarten sitzen / darumb verkündiget er ihr Christi vnd ihr Creutz.

Sihe / will er sagē / das ist ein wunderbarlich seltsam ding / dor auff niemands gedacht / dieser wird gesetzt zum fall vieler in Israel / das ist / er wird nicht wie jederman von dem Messia im treumen lest / ein Weltlich reich anrichten / sondern ein Geistlich reich / vnd es wird ihm sampt den seinen nicht wol / sondern gar vbel gehen. Dieser wird gesetzt zu einem fall ^{eis m̄w̄iv}. Simeon siehet in den 118. Psal. Der Stein den die bawleute verworffen haben / ist zum eckstein worden.

worden. Item/ in das 8. Cap. Esaie / da er spricht: Christi
stus werde sein ein stein des anstosses / vnd ein fels
der ergernis / Den zweyen Weisern Israel zum stri-
cke / vnd falle den Bürgern zu Jerusalem. Darauff
siehet auch Christus / Matth. 21. Wer auff diesen stein
fellet / der wird zuschellet / Auff welchen er fellet /
den wird er zumalmen. Solchs wirrte auch Petrus
den Schrifftaelerten vnd Hohenpriestern für / Act. 4. Das
ist der Stein / den die bawleute verworffen haben. Vnd
Rom. 9. sagt Paulus: Sie haben sich gestossen an den
Stein des anlauffens / wie es auch S. Petrus angeuche
1. Pet. 2. Also haben sie sich gestossen vnd geergert an Chris-
ti geringer Person / an seinen geringen eltern / an seiner lehre /
an seinem leben vnd leiden. Vnd man stösset sich noch doran /
vñ doran ist Christus nicht schuldig / sondern die Menschen / Er
gibt kein ergernis / sondern sie nemens. Gleich wie die Sons-
ne / die zu erleuchten pflaget / nicht darwider kan / das sie dem
schadet / der eriffende vnd böse augen hat / vñnd das von ihr ein
todtes ab stinckende vñnd faul wird. Item / es kan eine Rose
nicht dawider / das eine giftige spinne gifte aus ihr sauget / so
doch eine Biene Honig aus ihr machet. D. Martinus Lu-
therus erkleret die Wort des Simeonis also: Disz Kind hat
zweyerley bilde / ein ergerlich bilde / vñnd ein schön tröst-
lich bilde. Etlichen ist ein fall / wie ein stock in weg geleget /
darüber sie fallen / Etlichen ist ein aufferstehen / wie ein fels
am wege / daran man sich lehnet vñnd auffrichtet. Die
stolzen / hoffertigen vñnd klugen heiligen lauffen mit dem kopff
wieder ihn / prallen zu rücke / lestern vnd fluchen ihm / Aber die
Thoren / Narren / vñ armen Sünder stehen an ihm auff / vnd
glauben an ihn / Was ligt das stehet an ihm auff / Was stehet / das
felt an ihn / Was verloren vnd verdorben ist / wird durch ihn se-
lig / Was nerrisch ist / wird weise / Was sündhafftig ist / wird ge-
recht vnd heilig r.

B ij

Zum

Zum zeichen dem widersprochen wird.

Συμβολὸν ἀντιλογίας.

Zeichen wird für ein ziel / zweig oder schismahl
genommen / als Iob. 10. Thren. 3. Ofte wirds gebraucht
für ein fenlein / dazu die feinde lauffen / das plündern vnd be-
rauben wollen / der zuversicht / wann das ligt / so ligt es alles zu
boden. Also lehnen sich Könige / Fürsten vnd Herrn vnd die
Völcker wieder den H E X N vnd seine gesalbten / Psal. 2.
ein jeder will ram an ihm fangen / vnd sich an ihn reiben / vnd
zum Ritter an ihm geschlagen werden. Wer diesem ziel am
nächstesten scheust / der ist der beste schütz des Teuffels.

Also bezeugens die Biblische vnd Kirchenhi-
storien / das sich der Teuffel mit aller gewalt jederzeit mit lü-
gen vnd Mord wieder Christum auffgelehnet. So bald nur
Christus geboren ward / gönnet man ihm nehrlich den Stall /
da musste er in grosser kette geborn werden / hatte keine hand-
reichung von niemands. Darnach trachtet ihm Herodes
nach leib vnd leben / vnd musste deshalben Christus in Aegypten
fliehen. Da er in sein Predigamt trat / haben sich die Jü-
den nicht alleine mit Worten vielmals wieder ihn geleet / son-
dern haben ihn auch ofte vom berge stürzen / steinigen vnd
vmbbringen wollen / als einen Samariter / der Zölner vnd
Sünder gefellen / der den Teuffel habe. Summa sie haben
ihre heupt nicht ehe sanfft geleet / biß sie ihn auff die Fleischa-
banck geopffert / vnd ans Creuz geheffet haben. Wie Chris-
tus nach seiner Himmelfart in seinen Aposteln vnd Christen
von den Jüden angesochten / weisen der Apostel geschicht / Vñ
wie darnach Christus in seinen Christen von den Heiden vers-
folget / bis auff Constantinum Magnum, bezeugen die Kir-
chenhistorien / Wie es jzt gehe / siehet jederman vor augen / das

man

man in der Welt nichts weniger leiden kan/ denn Christum
vnd sein Euangelium.

Aus diesem stück des Segens vnd der
Propheceyung Simeonis lernen wir.

I. Erstlich / das Christi Reich nicht kan Weltlich /
sondern Geistlich sein / darumb wir auch bey ihm nicht zeitliche /
irdische vnd vergengliche schnöde Güter / Sondern ewige /
Himlische beständige Wohlthaten / als vergebung der sünden /
den heiligen G. ist / vnd das ewige leben / suchen sollen.

II. Das wir vns nicht daran ergern / wenn grosse
Leute / die vns mit Weisheit vnd verstand weit vberlegen /
zu rücke prallen / dem Euangelio spinnensfeind sein. G. D. t.
hat das grosse geheimnis nicht den klugen vnd weisen dieser
Welt offenbart / sondern den demütigen vnd vnmündigen.
Nicht viel weise nach dem fleisch / nicht viel gewaltige / nicht
viel edle sind beruffen / sondern was töricht ist für der Welt /
das hat G. D. t. erwöhlet / das er die Weisheit der Weisen zu
schanden machte / auff das sich kein fleisch rühme / 1. Cor. 1.

III. Das wir in sachen / die seligkeit betreffende / auff
keinen Menschen fussen sollen.

IIII. Das wir auff den grund der Apostel vnd der
Proppheten erbawet / da Christus selbst der Eckstein ist / vnd
kan kein ander grund der seligkeit geleyet werden / denn der
geleyet ist / IESVS CHRISTVS.

V. Vnd dieweil die trefflichen hochbegnadeten leute /
vnd deren viel in Israel an Christo sich stossen vnd ergern /
B iij sollen

Sollen wir durch frembden schaden Flug werden / vnd diese
hochnötige warnung wol war nemen / Das / wer da stes
bet / wol zusehe / das er nicht falle / 1. Cor. 10.

VI. Dieweil Christus gesezt zum fall vieler in Israe
el / folget daraus / das nicht alle Israeliten sind / die aus Is
rael sind / auch nicht alle Kinder Gottes sind / die Abrahams
Samen sind / Sondern die Abrahams vnd Israels
glaubens sind / Die nicht von dem geblüte / noch von dem
willen des fleisches / noch von dem willen eines Mannes /
sondern von Gott geboren sind / Ioan. 2.

VII. Dieweil er gesezt zum fall vnd zeichen / sol
man nicht aus dem zwiespalt vnd allerley übel / das sich bey
dem Euangelio zutregt / schliessen / als solte es niche Gots
tes wort sein.

VIII. Man sol auch nicht auffschieben die Lehr
des Euangelij anzunehmen / bis in einem gemeinen Conci
lio dieselbige in gemein für recht erkant vnd angenommen
werde / Das wird nicht geschehen / denn Christus ist gesezt
zum fall.

IX. Die verfolger sollen wissen / das sie an diesem
stein vbel anlaffen werden / vnd sich selbst verderben / wie
eine Wespen / so an einen Felsen fleuget / oder einer / der den
Kopff an einem stein zustößet.

Zur Auferstehung / *εἰς ἀνάστασιν.*

Es ist Christus nicht allein zum fall / son
dern auch zur Auferstehung vieler in Israel gesezt.
Diese

Dieser Eckstein/der one hende vom berge herab gerissen/
ist sehr köstlich. Esai. 27. Siehe /ich lege in Zion einen
bewerten stein/einen köstlichen Eckstein/der wol ge-
gründet ist / Wer glaubt / der flengt nicht/ er stehet
sicher wie ein Fewe/ vnd fürchtet sich nicht / Hat
nicht ein blöde Gewissen / wie es auch S. Paulus/ Rom.
10. ausleget / Denn die Schrifft spricht : Wer an ihn
glaubet / sol nicht zu schanden werden/Euch nu / die
ihr glaubet / ist er köstlich.

Ersilich leret hie Simeon/ das auch die Je-
sraeliten/viel mehr wir Heiden/im tieffen schlamm der sünden/
des todes / der Hellen vnd verdammis liegen/ Wir sind alle
in sünden empfangen vnd geboren/ vnd von natur Kinder
des zorns Gottes.

Zum andern / lehret er auch / das wir vns
selbst durch alle vnser freyheit nicht auffrichten können / es
liege nicht an jemandes wollen oder lauffen/ wir müsten vn-
ser halb ewig sterben vnd verderben / Psal. 49. Esa. 49.
Hat vns aber sollen geraheten vnd geholffen werden/ so hat
Christus müssen vnser Helffstein werden/ vnd aus dem schre-
lichen schlamm vnd trübsand auffrichten mit seiner gnadens-
reichen hand/ die er vns darbeut. Psal. 145. Er richtet ab-
le auff / die nieder geschlagen sind / wie der König Aha-
uerus die niedergesunckene Esther mit seinem Scepter wi-
der auffrichtet. Wer nu gefallen vnd nieder geschlagen ist/
der richte sich an diesem Fels durch den Glauben widerumb
auff.

Zum dritten gibt Simeon auch zu verstehen/
vnd wil damit die Eltern Christi trösten / Ob gleich viel sich
werden.

werden stossen vnd ergern an Christo/das doch auch immer
leute sein werden / die sich werden an Christo auffrichten /
auch etliche von Jüden/ Darumb nicht an allen zu verzä-
gen.

Afflictis
non est ad-
denda af-
flictio.

Zum vierden / Simeon hat auch Mariam
mit diesen Worten wollen segnen vnd trösten / ihr Gutes
Gnade vnd schutz verheissen. Also sollen wir auch betrübte
leute trösten / vnd für sie beten / 2. Cor. 1. 2. Thessal. 1.

Vnd es wird ein Schwert deine Seele
durchdringen / auff das vieler hertzen ge-
danken offenbar werden.

Simeon verfaßt der Marien den segnen treff-
lich sehr / vnd zeigt ihr an / das man mit ihrem Soh-
ne so vbel handeln werde / das sie daraus gros hertzeleid em-
pfinden werde. Es siehet vielleicht Simeon in den 105.
Psalm / der da sagt: Das das Schwert durch Josephs seele
gegangen ist. Also sagen wir / Es gieng mir ein Schwert
durchs hertze. Item / Es schnit mich scherffer / denn ein
Schermesser. Vnd Petrus sagt vom Loth / 2. Pet. 2. das
die Sodomiter Loths gerechte Seele gequelet haben. Hertze-
leid / vnd der Seelen leiden / ist vber alles leiden. Wil sas-
gen / Du wirst den Namen mit der that haben / du wirst
eine rechte Maria sein / welches bitterkeit heist / Du wirst
ein rechte betrübtes elendes Weib sein. Vnd warlich / wenn
man besiehet die Historiam von Christo / so hat sie gros hert-
zeleid an diesem Sohn erlebet / sie hat ihn müssen im stalle ges-
beren / hat müssen mit ihm in Aegypten fliehen / Sie hat ihn im
zwölfften jahre seines alters drey tage verloren / vnd mit
schmercken

schmerken gesuchte/ vnd es kan keine Menschliche Junge ihr
groß herzeleid aussprechen / das sie daraus empfunden / da sie
gesehen/ das solcher Gottes vnd ihr Sohn gefangen geführt /
verklaget / geschlagen/ verspottet/ verspiet / gekrönet / gezei-
setzt/ zum tode verdampft/ außgeführt/ schmechlich zwischen zweyen
Mördern gehenget/ vnd mit grossen geschrey seinen Geist / sei-
nem Himlischen Vater auffgiebt/ vnd sie vnterm Creuz ste-
hende solchem allem zusiehet.

Es ist aber Maria ein vorbilde der Christli-
chen Kirchen vnd aller Christen/ je neher einer Gott verwand/
je mehr einer dem Creuze vnterworffen / Gott herket die jenig-
en die er lieb hat / so hart / das ihnen die Seele möchte drüber
ausgehen: Wie diese zeit wir gehöret / von den vnschuldig-
gen Kindlein vnd ihrer Müttern zu Bethlehem aus dem
Propheeten Jeremia gehöret / der da spricht: Auff dem gebirg
ge hat man ein geschrey gehöret / viel klagens / weinens vnd
heulens / Rachel beweinet ihre Kinder vnd wolt sich nicht trö-
sten lassen/ denn es war aus mit ihnen.

Vnd Gott setzet die fürnembsten Christen an
die spize / wie ein Obrister im Kriege die besten Landsknechte.
Vnd Gott hat Mariam mit solchem einen knüttel neben dem
rudten gelegt / das sie nicht in Hoffart von wegen der Mut-
terschafft gerite/ wie Lutherus vber das 28. cap. Gen: saget:
Die Hoffart ist eine vnheilssame Kranckheit / vnd Gott muß
ihr offte mit andern Sünden oder schwerem leiden wehren/ vnd
wird nicht vertrieben / den mit dem schwerd Simeonis, oder
mit dem Ehebruch Bersabæ / oder mit dem verleugnung Pe-
tri, oder mit dem Satans Engel / oder mit der Pestilenz
Ezechia, Wie hirvon der Man Gottes Lutherus gar

E geistreiche

geistreiche word setzet vber das 23. Cap. Esaia. Tertio Tomo
Ienensi, Do er also schreibet. David plenissimus spiritu,
ne superbiret, in turpe adulterium prolapsus est. Ac
Petrus, nisi negasset Christum, fuisset elatus super omnes
Angelos. Sic Paulus, ne magnitudine reuelationum
extolleretur, additus est ei angelus Satanæ. Ipsa quoq;
Sancta Virgo non fuit tuta ab hac peste, nisi gladius Si-
meonis cor ipsius penetrasset. Sic omnes Christiani eru-
ce premuntur, ne insurgant in superbia & securitate con-
tra DEVM. Præsumptio enim & superbia illa, vere po-
dagra est, quæ omnes medicos ridet. Alia peccata, ut
sunt cædes, adulterium, scortatio, furtum & sentiuntur.
Sed hæc præsumptio est diabolica tentatio, in spiritu,
quæ non sentitur, nec potest tolli, nisi gladio Simeonis,
aut adulterio Bersabeæ, aut negatione Petri, aut angelo
Satanæ, alias est incurabilis morbus.

DU sind vieler Herken gedanken offenbar
worden/der Werckheiligen/der Phariseer vnd Heuchler her-
ken / welche für der Welt fromscheineten / sind offenbar wor-
den / daß sie verzweiffelte vnd Mörderische Buben gewesen
sind. Also sind alle werckheiligen die größten verfolger des
Herrn Christi vnd seines Enangelis / welches lehret / das der
Mensch aus gnaden solle selig werden / vnd damit verraten sie
sich / was für fruchtlein sie sind.

ES hat auch GOTT durch solch herkeleid der
Mariæ ihr Herz offenbaret / das sie gefühlet vnd ge-
sehen / was sie vermöcht vnd gekönte / denn creuz vnd leiden /
scheidet die rechten Christen von den vnchristen / wie der wind
das Wurmstichige Obst abwirfft / Also beweret der Wind
der ansehung / welches beständige vnd vnbeständige Christen
sind.

ken sein / vnd die Christen lernen sich im Creutz selbst erkens-
nen / vnd wird ihnen offenbaret / was sie können vnd vers-
mögen. Außerhalb der ansechtung vnd leidens lest sich
mancher bedüncken / es mangle ihm nichts am glauben / Lie-
be / Hoffnung vnd beständigkeit / er sey dermassen mit Gottes
wort gefast / das er allen Teuffeln widerstand thun wolle. A-
ber wenn er sein Latein sol aussagen / vnd die Dohsen am bers-
gestehen / wenn Gott seine hand abzeucht / vnd ihn sincken lest /
so befindet er das er nichts vermag / Psa. 30. Ich sprach da-
mirs wolging / ich werde nimmermehr danider lie-
gen / aber da du dein antlitz verbargest / erschrack ich /
ein exempel haben wir am Petro.

Im Creutz vnd leiden lernen wir erkennen /
was wir selbst sein / nemlich das wir ohne Gottes gnade nichts
vermögen / Wir lernen / was andere Menschen sein / nemlich
das sie ohnmchtig falsch vnd vntrew sein / vnd vns entweder
nicht helfen können / oder nicht helfen wollen. Item wir
lernen / was wir an dem Teuffel haben / nemlich einen listigen /
boßhafftigen vnd unablestlichen feind / der da vbersteiget / da den
baum am niedrigsten ist / vnd immer mehr zuschüret. Item /
wir lernen grinnen / was wir an Gott haben / so wir durch
den glauben vnd das gebet zu ihm fliehen / nemlich
einen gnedigen / trewen / Allmechtigen war-
hafftigen helffer. So viel von dem
ersten zeugen dem alten
Simeone.

E ij

Don

Von dem andern.

Was nun den andern Zeugen / Nemlich / die Heilige Prophetin Hannam vnd ihr öffentlich zeugnis von dem HERRN Christo anlanget / davon spricht Lucas also:

Vnd es war ein Prophethin / Hanna eine Tochter Phanuel / vom Geschlechte Aser / die war wol betaget / vnd hatte gelebt sieben Jahr mit ihrem Manne / nach ihrer Jungfrawschafft / vnd war nu eine Widwe bey vier vnd achtzig Jahren / die kam nimmer vom Tempel / dienet GOTT mit fasten vnd beten / Tag vnd Nacht. Dieselbige trat auch hinzu / zu derselbigen stunde / vnd preisete den HERRN / vnd redete von ihm zu allen / die da auff die Erlösung zu Jerusalem warteten.

Zweyerley sezt der Euangelist in diesen Worten.

- I. Die Beschreibung der lieben Hanna.
- II. Ihr zeugnis von Christo.

Denn damit man ihr zeugnis nicht von Weiber reden oder vnnütz geschweh / sondern als des Heiligen Geistes zeugnis hielte vnd anneme / beschreibet sie Lucas mit besondern fleis nach allen vmbstenden / vnd rühmet sie sehr / beydes
von.

von wegen ihrer Gottseligkeit / vnd denn von wegen ihrer
Hohen gaben / darmit sie von vnserm lieben HERN Gott bes
gnadet gewesen.

I. Erstlich nennet er sie ausdrücklich eine Prophetin /
das ist / er rühmet sie / das sie durch erleuchtung des Heiligen
Geistes von künfftigen dingen geweissaget / vnd aus den
schrifften der Propheten die nachrechnung gemacht hat /
Messias muste nun kommen / denn die zeit sey verhanden.

II. Zum andern sagt er auch von ihrem Geschlecht / sie
ist gewesen von geringen stam vnd geschlecht Aser Phauuels
Tochter / aus dem stam Aser / Aber von Gott der in der höhe
sitzet / vnd das niedrige erhöhen kan / hoch begnadet.

III. Zum dritten rühmet der Euangelist auch ihr ho
hes Alter / daß sie viel jahre mit Ehren erreichet / vnd wol bes
taget gewesen.

IIII. Zum vierdten gebe er ihr das zeugnis / daß sie sich
in ihrer Jungfrawschafft / Ehestand vnd Widwenstand gar
wol vnd ehrlichen verhalten habe / vnd derwegen ihrem zeug
nis wol zu glauben sey.

V. Zum fünfften vnd letzten / rühmet sie Lucas auch
von wegen ihrer Gottseligkeit / das sie Gott dem HERN
mit glaubigen hertzen gedienet / sich als eine Christliche Wid
we zum Tempel des HERN gehalten / tag vnd nacht zu vn
serm lieben Gott gebeten / das er den rechten Heiffstein vñ Ers
löser vom Himmel schicken / vnd den Heyland Menschlich
ches geschlechtes wolt lassen gebohren werden / das sie auch
sonsten ein nüchternes vnd messiges leben geführet habe .

Aus diesen erzelten umbstenden / wil nu der
Euangelist haben / das wir gewis schliessen sollen / Es müs-
se dieser alten ehrlichen vnd Christlichen Matronen zeugnis
nicht zuwerfften / sondern billich / hoch vnd wert zu hab-
ten sein.

II.

Was zeuget denn vns ander die heilige
Prophetin Hanna von dem Kind-
lein Ihesu ?

Der Euangelist meldets / da er also sagt:

Dieselbige trat auch hinzu / zu dersel-
bigen stunde / vnd preifete den HErrn / vñ
redete von ihm zu allen / die da auff die
Erlösung zu Jerusalem warteten.

Wie die liebe Hanna in ihrem Gestüle stehet /
nach Moysi ordnung / vñnd höret des Simeonis
zeugnis vñnd gesang von dem Kindlein Iesu / tritt sie auch
zum hauffen / vñnd gleubet ihres Pfarrers seligen worten / vñnd
seheth an Gott zu loben vñnd preisen / vñnd singet mit den andern
frawen / die da auff die erlösung warteten ihren Psalm / wie
denn ein sonderliches wörlein alhie von ihr stehet / welches so
viel heist / als nachsingen oder nachsprechen / das wie Simeon
vorgezeugt vñnd vorgesungen / Sie ihm nachgredet vñnd nach-
gesungen / Verkündiget auch darneben allen frommen Chris-
ten zu Jerusalem / das dieses Kindlein der rechte Messias
vñnd

vnd erlöser sey / der in die Welt kommen solte / das er Israel /
das ist / alle gläubige / aus des Teuffels gewalt / von allen sün-
den / vnd allen ihren feinden errette vnd erlösete.

Bei dieser alten / ehrlichen vnd Christli-
chen Widwen haben wir nu zu lernen.

I. Erstlich das bey Gott dem Herrn kein an-
sehen der Person sey / vnd das bey ihm gleich so viel gelte
Mann vnd Weib / wer nur an seinen Sohn glaube / ihn
fürchtet vnd recht thut / der ist ihm angenehm / es sey gleich
Mann oder Frau / Knecht oder Freyer / Jude oder Griech /
Eph: 6. Darumb sol sich niemand von der gnade Gottes
ausschliessen / Denn Gott hat seinen Sohn der ganzen Welt
geschencket / auff das alle die an ihn glauben nicht verlohren
werden / sondern das ewige Leben haben. Johan. 3. Daher
nennet auch Petrus die Weiber mit erben der gnaden vnd des
lebens / befihlet auch der halben den Männern / das sie ihnen
beywohnen sollen mit vernunft / vnd als dem schwächsten
Werkzeuge seine ehre geben. Gott will sie vmb ihrer vber-
tretung willen nicht von sich verstoßen / sondern zu gnaden auff
vnd annemen / wo ferne sie nur an seinen Sohn Christum
glauben / welches allen Weibsbildern ein herlicher vnd auß-
bündiger trost ist.

II. Zum Andern lernen wir / das ihm Gott
durch den Mund der vnmündigen vnd Seuglingen ein lob
berichtet vnd eine macht zurichtet / Psal. 8. Den da die grossen
Leute zu Jerusalem von dem Messia nichts wissen noch reden
wollen / nimpt Gott geringe vnd niedrige / doch fromme vñ mit
dem heiligen Geist erleuchtete Menschen / die müssen Predi-
gen /

gen/wollens nicht Männer thun /müssens Welber thun /wie
auch in der Auferstehung des H E X X I Christi die Gottseli-
gen Weiber die ersten zeugen vnd Prediger werden.

III. Zum dritten /wird allen ehrlichen Weibsbil-
dern/ Jungfrauen/ Ehefrauen vnd Widfrauen eine schö-
ne lehr gegeben/das / wie die liebe Hanna in allen dreyen stens
den gelebet / vnd Gott gleichwol darin gefallen/man gleich-
wol in allen dreyen stenden Gott dem Herrn dienen vnd ihm
gefallen könne.

IIII. Zum vierdten haben alle Menschen zu
lernen/das/wie die liebe Hanna from vnd Gottfürchtig ge-
wesen / sich zum Tempel gehalten / Gottes Wort gehört /
fleissig gebetet / den Priestern gedienet mit kleider waschen /
auch sonst sein nüchtern vnd messig gelebet. Wir auch
ihrem exempelfolgen/der Gottseligkeit vns befleissigen / gerne
zur Kirchen gehen / Gottes Wort hören / lernen vnd in einem
seinem guten herzen bewaren / ohn vnterlaß für vns vnd an-
dere Menschen beten / auch sonst nüchtern vnd messig leben
in Essen vnd Trinken / damit wir zum gehör Göttliches
Worts / zum gebet vnd zu den wercken vnsers beruffs / auch
zum lieben Jüngsten tage desto geschickter vnd bereit sein.
Wir sollen auch nicht allein in diesem Gottesdienste anfangen
/ sondern auch in demselben fortfahren / Luc. 1. auff das
wir ihm dienen ohne furcht vnsrer lebenslang in Heiligkeit vnd
Gerechtigkeit die ihm gefellig ist.

V. Zum fünfften haben wir auch zu lernen /
wie die heilige Hanna den H E X X I Christum im Tempel
nicht ohne gefahr bekennet ; Also sollen wir auch Christum bez-
kennen

kennen zur zeit der gefahr vnd verfolgung. Vnd wie sie ihn gepreiset / das ist Gott dem Vater gedancket / das er seinen Sohn in die Welt gesand / vnd seinem Sohn / das er sich so tieff gedemütiget: Also sollen wir auch thun.

VI. Zum sechsten wie die Prophetin Hanna auff solch ihre frommigkeit nicht ihr vertrauen gesetzt / sondern auff den Erlöser Israel / vnd da er kommen / sich mit andern herzlich darüber gefreuet: Also sollen wir vns zwar fleissig vben in den guten wercken / aber darauff nicht trauen vnd bauen / sondern auff den Erlöser Israel, vnd des ganzen Menschlichen Geschlechts / der vns durch sein Leiden hat errettet vnd erlöset von der Sünde / Tod / Teuffel / Helle vnd ewigen verdammnis. Er wird vns auch am Jüngsten Tage kommen nicht als ein Stockmeister oder gestrenger Richter / sondern als ein Erlöser / darumb sollen wir vns freuen / das sich als dann unsere erlösung wird nahen. Luc. 21.

Vnd wiewol allen Menschen gebüren wil / das sie dem Exempel Hannæ nachleben sollen / so will doch sonderlich den Widwen gebüren / das sie ihrem Exempel nachfolgen sollen / sintemal die Widwen herliche verheissungen in Gottes wort haben / das auch kein Stand vnter allen stenden ist / der solche zusagung Göttlicher gnaden vnd wolthaten heisset / als eben dieser Stand / davon zur andern zeit weitläufftiger vnd in sonderlichen Predigten gehandelt wird: fürstlichen aber findet man die herlichsten verheissungen Exod: 22. Deut: 10. 14. 22. 26. 27. Psalm: 68. 146. Esa. 1. Jerem: 5. 17. Ezech. 22. Amos. 7. Zach. 7. Malach. 3. Syrach. 14. 35. Proverb. 15. 1. Reg. 17. 2. Reg. 4. Luc. 7. Iacob. 1.

D

Welche

Welche nun wollen auff solche Verheissungen
fussen/ vnd diese wolthaten von Gott gewarten/die müssen sich
auch als Gottselige Widwen beweisen vnd die Gottseligkeit
von dieser Widwen allhir lernen.

So viel auch von dem andern zeugen von
der Prophetin *Hanna*.

Zum Beschlus.

Wie wir aber nun von der Prophetin *Hanna*
gehöret / das der Euangelist mit allem fleis ihres
stam / Geschlecht vnd herkommen / Leben / Wandel vnd
bekendnus beschrieben: Also können wir auch mit grund vnd
warheit von dieser verstorbenen Seligen Christin/ Der Edlen
vnd viel Ehrentugentfamen Frawen ANNA Von ENDE
sagen/weil Sie fast eben den Nahmen geführet (Denn A N-
NA oder H A N N A hat den Nahmen im Ebreischen vom
Worte / welches so viel heist als gratiosa Huldenreich) vnd
auch eines Ehrlichen alten Geschlechts vnd herkommens ge-
wesen / welches iso sehr abgenommen / wie dann ihr Vater
Melchior Kares Heupman auffm Stolpen / ihre Mutter eine
von Salhausen gewesen / welche sampt ihres lieben Juncfern
Blutsfreunden vnd verwandten mehrers theils allhier zu
Grim in der Kirchen begraben liegen / nemlich Hans Kares
Weilande Landrichter / Georg Kares Amptman in der
Glasehütten / so fast die ganze Refier vmb Pirn administri-
ret vnd inne gehabt / das also / wenn es die noth erforderte zus-
ergelen / wie die alten Originalien ausweisen / diß ihr geschlechte
in die vierhundert jahr geweret hat.

Im

Im sechszehenden Jahre ihres alters ist sie dem Edlen/
Bestrengen vnd Ehrvesten Godfrid vom Ende auff Picha
Ehelichen vertrawet worden/ Anno 1541. Bey ihrem Groß-
vater Melchior von Salhausen zu Schweta Begraben wird.
In ihrem Ehestande hat sie gelebet drey vnd zwanzig Jahr/
Dorin sie vnser lieber Gott gesegnet mit drey Söhnen vnd fünff
Töchtern/welche sie in der vermanung zum H E R R N der
Gottseligkeit/Gottesfurcht/guten künsten/auffrichtigkeit vnd
redligkeit/adelicher zucht vnd erbarkeit ganz trewlich vnd fleis-
sig hat auffziehen lassen / Also das sie Fürsten vnd Herrn in
ihrem dienst trew gewesen/ deshalben von ihnen lieb vnd werd
gehalten/geehret vnd gefördert / auch noch bey Hohen Heups-
tern in reputation, guttem ansehen bis auff diese zeit sind.
Vnd ob gleich nach ihres lieben Junckern abschied/ diese ver-
storbene Christin viel sorge / bekümmernis / wiederwertigkeit/
Trübsal/Angst/Noth vnd Armut / sampt den ihren außges-
standen/hat sie doch solches alles gedultig vnd willig vbertra-
gen in die 30. Jahr ihres Witwenstandes/vnd sich gehalten
zu den mitteln die vnser lieber Gott seinen Christen zu trost vnd
heil geordnet/nemlich zu der Predigt des Heilig vnd seligmas-
chenden Worts Gottes/zum lieben Gebet vnd zum rechten
gebrauch der Hochwirdigen Sacrament/daraus sie einen was-
ren beständigen glauben vnd gewisses vertrawen an ihren ei-
nigen Erlöser vnd Seligmacher I E S V M Christum ges-
schöpffe/ in ihrem vielfeltigen Creuz vnd Leiden ihre Seele
mit gedult gefast/wie sie denn ein schön Exempel der Christ-
lichen gedult gewesen / auch die werck der Christlichen Liebe
nach der vermanung des H E R R N Christi vnd Apostels S.
Pauli gegen ihren nechsten Freunden vnd Feinden ganz
Christlich erzeiget vnd beweiset / auch nach ihrem geringen ver-
mögen gegen den Armen zu tag vnd nacht/wenn sie erfordert/
gebeten vnd angesprochen worden/sich gutthetig vnd wilferig

D ij

verhalten/

verhalten/das fünffziger zeit die Armen allhier sie vbel vermiffen vnnnd entrahten werden. Die ihren hat sie trewlich zur zucht / Demut Fried vnnnd Einigkeit vermanet / auch sonsten dem Exempel der Monica des Heiligen Augustini Mutter nach / Nachbarn vnd Freunde zur einigkeit vnnnd frieden vermanet.

Vnd hat ihr die vntrew / falschheit / List / Betrug / Verleumdung / ergerliche Hoffart / Pracht vnd Vbermut / der sie gen newen / argen / bösen Welt / Herzlich vnd schmerzlich wehe gethan / darüber sie oft geklaget / vnnnd vber den wunderbaren seltsamen vnnnd bösen hendeln so die leut surnemen mit vngerechtigkeit / betrug vnnnd verforthellung des nechsten verwundert / zum offtern beklaget / auch wol beweinet / weil sie gesehen / das dadurch der zorn Gottes zeitliche vnd ewige straffen vber fromme vnnnd bösen / gerechte vnd vngerechte verursacht / erregt vnd bewege werde / Das wir also an ihr eine gute fleissige beterin in dieser gemaine verlohren / welche mit ihren herzlichem seuffzen den zorn Gottes vnnnd fünffzige straff auffgehalten. Welches ich mit grund vnd warheit dieser verstorbenen seligen Christlichen Matronen zeugnis geben kan / die weil ihr thun vnd wandel mir nun in die etliche zwanzig jahr bekand / vnd ich in die Sechzehen jahr ihr Pfarrer vnnnd Seelsorger allhier gewesen / das sie ein Speculum omnium muliebrium virtutum; Ein Spiegel aller Weiblichen vnnnd Christlichen tugenden gewesen ist.

Nach dem aber vnser lieber Gott vnd Vater / sie am letzten Weihnacht Feyertage gegen Abend mit einem harten geschwinden frost / vnd kaltem flus angegriffen / welches ihr etliche Jar zuuor auch begegnet / der vrsachen sie in furcht gestanden / als wenn sie der mal eins an solchem bleiben würde / Hat sie ihren Pfarrer vnd Seelsorger zu sich
ersor

erfordere/sich mit Göttlichem worte erösten lassen/auch selbst
in beysein ehlicher Adelpersonen vnd anderer sich getröstet/
mit vermeldung/ wie sie dis jammerthal eine gute zeit in die
siebenzig Jar gebawet / ihr ziel erreicht / vnd wie des Apo-
stels wort lauten / Den Lauff vollendet/ vnd versehe sich
nu mehr nichts gewissers / denn das sie der getrewe GOTT /
aus diesem Pilgram vnd wanderschafte / in das ewige Va-
terland abholen werde.

Auff die folgende nacht gegen morgen des lieben neuen
Jars/ als sich die schwachheit vormehret / hat sie das Hoch-
würdige Abendmahl des waren leibes vnd bluts Jesu Christi/
in warer anruffung / bußfertigem vnd gleubigem herzen/ vnd
sehnlichem verlangen gebraucht vnd empfangen/ vnd darauff
zu den umstehenden gesagt: Sie hette das liebe Neue
Jar von ihrem Seligmacher Jesu Christo bekom-
men / Hat auch dafür mit auffgehobenen henden / herzlich
vnd demütig gedancket/ vnd gesagt: Wer wolte nu nicht
gerne sterben. Hat also am lieben Neuen jahre sich gegen
ihren lieben Töchtern vnd umstehenden freundlich vnd mit
gutem bedacht herzlich gesegnet / das gemeine gebet der Christo-
lichen Kirchen begeret / gegen die nachbarn aller erzeigten liebe
vnd freundschaft ganz sehnlich bedancket/ vnd eins theils erin-
nert/ das es musste gescheiden sein / auch der wiederzusammens-
kunfft halben getröstet/ wie sie bald hernach folgen/ vnd einan-
der in der ewigen Freude / Bonne vnd herligkeit beywohnen
würden / welche ihr zu Christlicher erinnerung das gebetlein:
HERR IES V Christ war Mensch vnd Gott in-
brünstig vorgesprochen/ darauff sie ganz sanfft vnd stille/ als
ob sie natürlich einschlieffe / verschieden. Vnd hat also mit
dem lieben Neuen jahre auch ein neues seliges vnd Ewiges
Leben angefangen / wie man auch von andern Gottseligen
Christen/ so am lieben neuen Jahr von hinnen geschieden sein/

Dij

lieset.

Keser. Als von dem Christlichem Könige in Dennemarck
CHRISTIANO III. Dem etwa acht tage vor seinem
abschide ein man sichtiglich erschienen / vnd ihn hatte geheissen /
er solte guts muts sein / es würde bald mit ihm besser werden /
vnd er solte mit dem folgenden newen Jahr ein neues leben an-
fahen / welches auch also geschehen / den der König am Newen
jahrstag 1559. in Gott sanfft vnd stille entschlaffen.

Vt primum incipient anni nova tempora, dixit:
Scito quod incipiat tunc nova vita tibi.

Auch diß erlanget / darnach sie offte vnnnd viel beyde im
leben vnd vor ihrem Seligen ende gewünschet / das sie möch-
te in Frieden bey ihren lieben Eltern begraben werden.

Haben also zum beschlus auch von dieser seligen AN-
NA semplich vnd sonderlich zu lernen / das auff ein Christ-
lich / Gottselig / sanftes leben / auch ein seliges vñ sanftes ende
zu folgen pflege / welches / wie der Man Gottes Lutherus sagt:
Ein schatz ist ober alle schätze / vnd wer dieses davon bringet / der
sey selig vnd wol hie gewesen.

Sonderlich aber haben Widwen vnnnd Waisen von
dieser verstorbenen Christin zu lernen / daß / wann sie der obge-
dachten verheissung vnd zusage theilhaftig werden vnd bleiben
wollen / das sie auch ein solch Christlichen / Züchtigen / Erbarn
vnd keuschen wandel führen sollen in Heiligkeit vnnnd Gerech-
tigkeit die Gott gefellig sey / vnnnd dasselbige ihr lebenslang / da-
mit sie ihres glaubens ende / nemlich der Seelen Heil vnd Sel-
igkeit / wie diese Christliche Matron davon bringen mögen /
an welcher der spruch S. Paul. 2. Tim: 4. erfüllet worden /
welchen sie offte vor ihrem ende wiederholet: Die zeit meines
abschiedes ist verhanden. Ich habe einen guten
Kampff gekempffet / ich hab den lauff vollendet / ich
hab glauben gehalten / hinfort ist mir beygelegt die
Kron

Von der Gerechtigkeit/welche mir der **D E X** an jenem tage der Gerechte Richter geben wird/Nicht mir aber allein/sondern auch allen die seine erscheinung lieb haben.

Weil sie dann in wahrer anruffung vnd erkenneniß ihres mitlers **IESV** Christi eingeschlossen/haben wir gar keinen zweiffel/sie seyn in der schoß Abraham in der hand Gottes/im ewigen Paradis/vnd könne sie keine qual mehr rüren als eine Seele der Gerechten. Sollen derwegen die ihren vber dem Christlichen abschied ihrer lieben Fraw Mutter sich zu frieden geben/ihren willen in Gottes willen stellen/nach der vermanung Iesu Syrachs am 38. Mein Kind/wenn einer stirbet so beweine ihn/vnd klage ihn/als sey dir gros leid geschehen/vnd verhülle seinen Leid/gebürlicher weise/vnd bestate ihn ehrlich zum grabe. Du solt bitterlich weinen/vnd hertzlich betrübt sein/vnd leide tragen/darnacher gewesen ist/zum wenigsten ein tag oder zween/auff das man nicht vbel von dir reden müge. Vnd tröste dich auch wieder/das du nicht trawrig werdest/denn von trawren kompt der Tod/vnd des Hertzen trawrigkeit schwedet die Kressste.

Trawrigkeit vnd armut thut dem Hertzen wehe in der anfechtung vnd vbertrit.

Las die trawrigkeit nicht in dein hertz/sondern schlahe sie von dir vnd dencke ans ende vnd vergis nicht/denn da ist kein wiederkommen/es hilfft ihn nicht/vnd du thust dir schaden. Bedencke an ihn/wie er gestorben/so mustu auch sterben/gestern wars an mir/heute ist es an dir.

Weil der Todte nu in der ruge liegt/so höre auch auff sein zugedencken/vnd tröste dich wieder vber in/weil sein Geist von hinnen gescheiden ist.

Der



Der Barmherzige Gott verleihe ihr vnd
vns allen nach vnserm seligen Absterben eine fröht-
che Auferstehung vmb IESV Christi willen. Der
selbe getrewe Gott / der den lieben Jacob in der
frembde / den lieben Joseph auch erhalten vnd getrö-
stet hat / der wolle die betrübtten Waislein vnd alle
betrübtten als ein Vater vnd Richter der Widwen
vnd Waisen / als ein Gott des trosts vnd der hoff-
nung / auch der gedult mit seinem Heiligen
Geist vnd word trösten vnd auffrich-
ten durch Christum
A M E N.

74 500 ak



Gedruckt in der Churfürst-
lichen Stad Dresden / durch
Bimel Bergen / wonhafftig
in der Morikstrassen.

Im 1595. Jar.

M




Pon 26 500, 6X

ULB Halle 3
003 930 70X







B.I.G.

Farbkarte #13

552 QK 293

v. Ende

Zb
500

Eine Leichpredigt

Vnd

Christliche Betrachtung

des seligen Abschiedes aus dieser Welt /
Der Edlen vnd viel Ehrentugentsamen Frawen ANNA
VON ENDE, des weiland Edlen / Gestren-
gen vnd Ehrnehsten Junckern Gottfried von Ende
auff Picha vnd Planckenhain seligen nachgelassenen
Widwen / welche am Nawen Jarstage des 1595.
Jares zu Reinhardts Grim / sanfft im HERRN ent-
schlaffen / vnd den 11. Januarij doselbst in der
Kirchen Christlich vnd Ehrlich zur
erden bestattet worden.

Gehalten durch

M. THEOPHILVM GLASER
Pastorem vnd Superintendenten
zu Dresden.



Dresden.

Gedruckt bey Samuel Bergen.

M. D. XCV,



V. 140